

Sumpah Pemuda

KEMUNCAK perhimpunan raksasa Pergerakan-pergerakan Pemuda Barisan Nasional mengecam ugutan Russia di sini, petang ini ialah bacaan *Sumpah Pemuda 15 April, 1983* oleh lebih 5,000 orang diketuai oleh Ketua Pemuda Umno, Encik Anwar Ibrahim.

Sumpah pendekar itu, yang dilafazkan dengan penuh semangat dan suara yang lantang berbunyi:

● Kami Pemuda Malaysia yang berhimpun pada hari yang keramat ini dengan penuh takwa, takzim serta kerelaan berbakti, sebagai benteng waja agama, bangsa dan negara, **bersumpah** akan mempertahankan maruah dan kedaulatan negara sehingga ke titisan darah terakhir.

● Kami bersumpah dan mengaku menjunjung perjuangan meninggikan darjat, maruah, martabat serta kehormatan agama, bangsa dan negara Malaysia yang tercinta. Kami tidak akan membenarkan walau seincipun tanah tercinta diperkosa dan dinodai oleh sesiapaapun.

● Kami bersumpah dan mengaku memperkukuh perpaduan kami rakyat Malaysia, menghayati nilai-nilai disiplin, tanggungjawab, persaudaraan, keikhlasan dalam perjuangan dan kesungguhan berkorban untuk agama, bangsa dan negara.

● Dan kami bersumpah dan mengaku berdiri teguh di belakang Perdana Menteri dan kerajaan demi menjamin negara dan rakyat Malaysia yang berdaulat, bersatu, adil dan makmur.

Merdeka! Merdeka! Merdeka!